

Acusacionnan di Korthals Altes den Parlamento ta sumamente grave

Credibilidad internacional di Aruba ta worde kibra

ORANJESTAD(AAN)--

E acusacionnan di ex Ministro di Justicia di Hulanda, Korthals Altes den Parlamento Hulandes, a bira topico di dia. Den un declaracion e Miembro di Parlamento pa AVP, Tico Croes, a bisa cu e declaracionnan di Korthals Altes ta sumamente serio.

Segun Tico Croes, loke e ex Ministro Hulandes a trece dilanti ta refleha loke pa basta tempo AVP ta señala y loke tabata topico di un serie di pregunta, cu el a lanza na Ministro di Justicia algun tempo pasa. Den e preguntanan aki, Tico Croes a cuestiona e autonomia cu Justicia ta goza di dje y e forma arbitrario di

actua di Gobierno, cu ta crea problema den Polis y den Ministerio Publico.

E declaracionnan cu Gobierno di Aruba ta mishi cu Justicia, manera expresa pa Korthals Altes den Parlamento Hulandes, tin un impacto ariba e credibilidad di Aruba den exterior y ta mishi tambe cu e reflejo di estabilidad di e pais.

Tico Croes a muestra cu ya tur decision di gobernantenan anterior ta worde poni un banda, manera a socede den e caso di Casino pa Harbourtown. E confianza entre Gobierno y ciudadanonan, cu ta hopi importante, ta bay perdi mientras cu

esnan cu Gobierno kier, e ta laga persigui. Na mes momento e situacion ta fastioso pa inversionistanan.

E Miembro di Parlamento a elabora ariba e hecho cu a laga un traficante den droga bay, manera e acusacion haci den Parlamento Hulandes ta indica. E pregunta ta, cu ki credibilidad internacional Aruba ta bay papia di combatiendo di droga cu otro paisnan, cu ta haya e imagen di un Gobierno narcocooperativo.

Segun Tico Croes mester bay clarifica loke a worde treci dilanti den Parlamento Hulandes y ya ta worde mira ki pasonan lo por tumar den e direccion aki.

Mientrastanto e asunto ta keda un indicacion, cu Aruba a bolbe worde converti den un area di riesgo alto, manera tabata e caso na 1985, ora na forma arbitrario a gasta 300 Millon Florin.

Tambe Tico Croes a referi na e Nota encuanto futuro estatal di AVP, den cual ta worde muestra

con facil e pais por cay den man di narcotraficantenan, si Gobierno mes no tin firmeza. Algo cu ta sali dilanti tambe den desaroyonan den region.

Desaroyonan, segun Tico Croes ta indica cu silenciosamente dictadura ta haci su entrada na Aruba, si tene cuenta cu e persecucion di ciudadanonan, cu no ta gusta, y e forma cu ta actua enfrente Justicia. El a muestra cu ta e tendencia aki AVP kier para y lo lucha pa stop.